

INUIT ATAQATIGIIT

Inatsisartuni



23. juli 2019

UKA2019/047

Inatsisartut Suleriaasianni § 33 naapertorlugu Inatsisartuni aalajangiiffigisassatut siunnersuut imaattoq matumuuna saqqummiuppara:

Imminut pilersorneq nunatsinni annertusarniarlugu Naalakkersuisut periusissiamik kingusinnerpaamik UKA2020-imi Inatsisartunut saqqummiunneqartussamik suliaqaqqullugit peqquneqarnissaannik Inatsisartut aalajangiiffigisassaattut siunnersuut. Periusissiaq aamma inatsisitigut aningaasatigullu aporfiit nutartigassat aaqqissuuteqqinnissaannut innersuussutinik imaqassaaq.

(Inatsisartunut Ilaasortaq Múte B. Egede, Inuit Ataqatigiit)

Tungavilersuut:

"Pissutsit nammineq takullugit iliuuseqarnarnerusarpoq."

Taamak aasaq savaatillit ataatsimeersuarneranni Aalisarnermut, Piniarnermut Nunalerinermullu Naalakkersuisoq nunalerinerup imminullu pilersornerup pitsanngorsaaviginissaannut neriulluarnartumik oqaaseqarpoq.

Imminut pilersornermi siuarsassagassat ataasiinnaanngimmata nunatsinni piniarnikkut, aalisarnikkut nunalerinikkullu neqissaqarniarnitsinnik naatitsinikkullu annertunerusumik periarfissanik inerisaanikkut allatigullu aamma inerisaanitsigut avataaniit isumalluuteqarnerput annikillisarsinnaavarput.

2016 tikillugu nunap immikkoortuisa ineriartortinnissaannut periusissaq atuussimagaluarpoq, uggornaraluartumilli tusarsaajunnaarpoq. Taamatuma ilutigisaaanik nunatta inuussutissarsionnikkut siunissamat ungasissumut isigisumik siuariartornissaa ersarissaq takujuminaallivoq.

Assinganik aamma ippoq 'Nunalerineq pillugu ataatsimiitsitaliarsuup' februar 2014-imi innersuussutaasa ulloq manna tikillugu timitaliiffigineqarsimannginnerisa nunalerisortatsinnut equinerlulersimanera. Allaat savaateqarfiit matooralernerannik kinguneqartoq.

Nunatta inuussutissarsiutitigut siuarsarneqarnissaa ataatsimoorfigissavarput, taamaattumillu siuarsaanissaq timitalerumallugu allorassaaqatigiiffissatsinnik pilersitsisariaqarpugut. Nunaqarfiit, Kommunit Namminersorlutik Oqartussallu akunneranni inuussutissarsionnikkut siuarsaanermi politkkikkut pingaarnersiunerit ersarissut nunap inuussutissarsionnikkut siuariartornissaani

avaqqunneqarsinnaangillat. Taamatullu sinaakkusiornermi aamma inuussutissarsiortut peqataatilluarneqartariaqarlutik.

Oqartoqartarpoq nuna imminut napatilluartup ilikkarsimasaraa qanoq annertunerpaamik imminut pilersornissi, aammattaarlu nunat imminut pilersorsinnaalluartut tassaasut attaveqaatitigut nunallu naleqartitaanik nutarsaassisinnaalluartut.

Imminut pilersorneq annerusoq politikikkut annertusisamik uukktarineqarluni siunnerfigiqarneratigut pilersaarusernerqarneratigullu, kiisalu inatsisitigut allatigullu aporfiit periarfissanik taarsernerisigut siunissamut iliuuserineqarsinnaasut toqqammavissat ersarinnerulerneranik kinguneqassaaq.

Nunatta inuussutissarsiutitigut imminut siuarsarneratigut avammut aamma niuernerput annertusarnissaannik periarfissat annertusarumallugit imminut pilersornermut pilersaarummik naalakkersuisut pilersaarummik saqqummiussinissaannik siunnersuuteqarpunga neriuppungalu siunnersuut manna tigulluarneqarumaartoq. Avataaniit isumalluuteqarnitta annikillissarnissaannik aamma siunnersuut tunngavissiissammat.

Pisortanut aningaasatigut allaffissornikkullu kingunissai:

Ineriartortitsinermut pilersaarummik sulineq ukiumut naammassineqarsinnaasooq qaangernaviangikkaa naatsorsuutigineqarpoq, tassani ilaatinneqarlutik nutserinerit.

Naalakkersuisoqarfiit akunnerminni ataqatigiissaarisariaqassanerisa siumut ilaanginnissaa naatsorsuutigineqarsinnaangilaq.

Namminersortunut aningaasaatigut allaffissornikkullu kingunissai:

Namminersortut minnerpaamik allaffissornikkut pilersaarusernerup nalaani tusarniaavigineqarnissaannik kinguneqassasooq naatsorsuutigineqarpoq.

Innuttaasunut aningaasatigut allaffissornikkullu kingunissai:

Soqangilaq.